

Uvodne napomene supervizora za Brčko na redovnoj konferenciji za tisak održanoj 4. rujna 2002. u prostorijama OHR Brčko

U Brčko Distriktu je trenutno u tijeku jedan vrlo važan proces, i želim da budem siguran da su sve firme u Distriktu upoznate s tim. Svako poduzeće se mora preregistrirati u sudu u Brčkom i od Uprave prihoda Distrikta mora dobiti novi poreski broj do 31. prosinca. Sada je vrijeme da se to uradi. Nemojte čekati prosinac kada će ovi uredi biti pretrpani zahtjevima za preregistraciju. Po mom mišljenju, dva glavna cilja ovih aktivnosti su značajna za sve nas, a to su: eliminirati fiktivna poduzeća i učiniti da poreski sistem bude pravedniji i efikasniji. Ljudi koji ne plaćaju porez krše zakon. Jednako je važno da oni time zapravo obmanjuju i građane kojima su potrebne usluge Vlade kao i ljude koji redovno plaćaju poreze. Ja bih volio da porezi budu niži za svakoga ali to je moguće samo ako svako redovito plaća svoj dio poreza.

Rok u kojem privremeni korisnici mogu podnijeti zahtjev za povrat imovine će biti još kraći od ovog o kome smo upravo govorili – do 31. listopada. Sukladno novim amandmanima na Zakon o povratu napuštene imovine, svi koji žive na spornoj imovini a koji ne podnesu zahtjev za povrat prijeratne imovine do ovog datuma, mogu biti deložirani bez obezbjeđivanja alternativnog smještaja. Siguran sam da mnogi poštivaju ovaj zakon ali sve osobe koje ne postupaju ovako neminovno će se suočiti sa ozbiljnom situacijom. Suzana Pejčić će po pitanju ovoga pripremiti jedno priopćenje za javnost.

Sutra i prekosutra imamo veoma važan sastanak ovdje u ovoj sali. Četiri zemlje savskog bazena – Hrvatska, Slovenija, Jugoslavija i Bosna i Hercegovina – dolaze da zaključe konačni tekst Međunarodnog okvirnog sporazuma za savski bazen. Ovo je ključni korak. Sada nam je potreban taj konačni tekst kako bi sporazum što prije ušao u fazu potpisivanja i ratifikacije.

Ovaj sporazum je veoma povoljan. On utvrđuje ciljeve i okvir Komisije za rijeku Savu čiji je zadatak ponovno uspostavljanje plovidbe, održivo upravljanje vodama i odbrana ili spriječavanje poplava i štetnih uticaja zagađenja. Brčko je nominirano kao sjedište ove Komisije i Brčko Distrikt je spreman da višestruko podrži rad ove Komisije. Ovaj Okvirni sporazum je, naravno, samo početak rehabilitacije i razvoja jednog ogromnog prirodnog izvora – rijeke Save. Biće potrebno poduzeti praktične mjere u cilju ispunjavanja ciljeva ovog sporazuma a za to će nam biti potrebna sredstva. Biće čak potrebno potpisati dodatne međunaradne sporazume. U svakom slučaju, četiri zemlje su radile zajedno veoma dobro tijekom prošle godine i ja sam uvjeren da će sastanak koji će se održati ovog tjedna biti jedan veliki korak naprijed.